



*Ionas estant enuoyé de Dieu pour prophetiser en Ninive, s'enfuit ;
& monte sur la mer.*

LA parole du Seigneur fut faite à Ionas fils d'Amathi, disant : Leue-toy, & t'en va en Ninive la grande Cité, & presche en icelle, & que sa malice est montée deuant moy. Mais Ionas se leua pour fuir en Tharsis arriere de la face du Seigneur, & descendit en Ioppé, où il trouua vn nauire qui s'en alloit en Tharsis, & bailla le prix de son nauigage, puis descendit dans le nauire pour aller avec eux en Tharsis arriere de la face du Seigneur. Or le Seigneur enuoya vn grand vent sur la mer, & y fut faite grande tempeste, tellement que le nauire estoit en danger de rompre : Doncques les mariniers eurent crainte, & les hommes crièrent vers leur Dieu, & ieterent en la mer les vaisseaux qui estoient dans le nauire pour l'allegier ; & durant la tempeste Ionas dormoit d'un profond sommeil, & le Gouverneur descendit vers luy, & luy dist : Comment-es-tu ainsi espris de dormir ? Leue-toy, & inuoke ton Dieu, pour voir si parauanture il aura memoire de nous, & que nous ne perissions.